

Kenneth Jong di Partido MEP ta anuncia:

Proyecto "Parlamento Hubenil" a cuminza



ORANJESTAD (AAN): Segun Kenneth Jong di Partido MEP, den e ultimo añanan masha hopi a worde priminti na nos Hobennan, pero net nada a worde haci pa nan. door di cual tambe e problemanan bou di nos Hubentud a bira mas y mas grandi. Problemanan manera e.o. embarazo hubenil, drogadiccion, alcoholismo, falta di motivacion pa enseñanza y

asina nos por sigi menciona. Problemanan cu mester worde ataca riba termino corto, sino nos futuro generacion lo ta bay tin problemanan serio. E fundeshi pa futuro lo bay ta fofo. Pesey nos Partido a dicidi di bay haci algo structural ariba e problemanan aki.

"Bou guia di Marisol Tromp y cu ayudo di Juni Arends y di mi persona, Kenneth Jong a worde traha un nota completo riba e problematica aki. E proyecto aki nos a yama "Guia pa lantamento di un Parlamento Hubenil Arubano". E proyecto aki mester bira algo Nacional pa nos Hobennan unda nan voz lo resona y unda nan ta bisa con pa ataca nan problemanan. Ta bon pa remarca cu

nos Hobennan door di tecnologia moderno di computer, internet y telecomunicacion, ya no ta e mesun Hubentud di antes. Hopi di nos gobernantenan actual ta purbando pa ataca e problemanan aki, pero hopi biaha no sa con, ya cu nan no a lanta den e tempo aki y no por imagina con cierto cosnan ta bay awendia."

Pesey ta bira tempo pa Aruba haya su Parlamento Hubenil na unda nos Hobennan mes ta yuda trece solucionnan pa nan problemanan y asina nan lo bay yuda nos mandatarionan pa ataca e problemanan di nos Hubentud lo mihor posibel pa medio di mocionan cu lo mester worde aproba den Parlamento y despues ejecuta pa Gobierno.

Nos Hubentud ta e base di futuro y den partido MEP tin tur e atencion nesario pa nos Hobennan. Partido MEP tin e futuro generacion na pecho. Sigur cu partido MEP y especialmente su ala hube-

nil H.O.T. lo sigui traha na beneficio di nos Hubentud.

Meta di e Parlamento Hubenil ta:

- haya sa a fondo kico ta realmente e motibonan di diferente problemanan bou di nos Hobennan.

- haya con ta e mihor manera pa solucionan e problemanan aki.

- laga nos Hobennan sera conosi di aserca cu nos reglanan di Parlamento!

- crea lidernan pa mañan.

- stimula nos Hobennan interer pa politica.

Organisacion di e Parlamento Hubenil:

- for di e mas o menos 52 organisacionnan pa Hubentud aki na Aruba lo worde escohe e 21 miembronan di e Parlamento Hubenil.

- basa riba nan escohencia e 21 miembronan aki lo bay worde reparti den dos ramo: un grupo cu lo yama PROGRESISTA y e otro cu lo yama CONSERVATISTA. Esaki pa evita cu cualkier politico por bay haci politica

barata cu nos hobennan.

- tur Hobennan entre 16 pa 21 aña por participa.

Tambe nos a bin cu otro requisitonan necesario manera unda pa reuni, cuanto vez pa siman, e gastonan etc. pa por implementa e plan aki. E gastonan total tambe a worde calcula y ta den e plan. E proyecto aki ta di sumo importancia pa un progreso sano di un pais. Proyectonan asina ta funcionando den diferente pais di Latino America y tambe na Antiyas Hulandes. Cu yudanza di nos Parlamentarionan y di e grupo di trabou di e proyecto aki e pomer reunion di e Parlamento Hubenil lo ta na November venidero.

E comision cu ta traha riba e proyecto aki lo bay tin diferente contactonan den e simannan venidero cu tur e gruponan di hoben aki na Aruba.

Nan lo tene e hubentud Arubano bon na altura di e desaroyonan di e proyecto aki.